



焦太史編輯國朝獻徵錄卷之六十四目錄

南京都察院

都御史

向寶

石璞

黃紱

金澤

熊繡

張鼐

劉洪

張琮

何瑋

王爌

端廷赦

海瑞

王樵

沈子木

副都御史

邵玘

夏廸

吳訥

朱與言

羅篋

章律

陳璠

汪舜民

歐陽旦

孫修

趙載

柴經

趙汝濂

僉都御史

嚴升

張楷

陳世良

裴紳

目錄畢

焦太史編輯國朝獻徵錄卷之六十四

南京都察院

南京都察院右都御史兼詹事向寶傳

實錄

南京都察院右都御史兼詹事府詹事向寶字克忠
江西進賢縣人洪武乙丑進士初授兵部試員外郎
九年無過特陞通政使以不善奏對力辭改應天府
尹建文中坐累謫廣西 太宗文皇帝入正大統召
復前職又坐累繫獄數年左遷兩浙鹽運司判官
仁宗皇帝在東宮知其廉名卽位驛召還朝陞都察

院右都御史翊日入謝命兼詹事府詹事給兩俸有
詔求言寶陳八事其一曰錄用勲舊二曰設置諫官
三曰選舉賢才四曰簡練將帥五曰貴重有司六曰
考覈吏員七曰監生資格八曰流通鈔法言多可采
上卽位之初命蒞南京都察院秩滿入覲上憫
其老命致仕歸以宣德三年八月卒於道訃聞遣官
賜祭命有司治葬寶儒者有文學寬厚愛民而持身
清介累遭困阨未嘗易操平居言不及利疏食水飲
自處甚適歷任四十餘年卒之日家具蕭然

資政大夫南京都察院左都御史臨漳石公璞

傳

崔銑

石璞字仲玉臨漳人初爲監察御史遷江西按察司
副使按察使山西布政使璞剛直有治才所在著稱
在江西時有民娶婦三日矣婿婦往拜其家婿先歸
婦後失之遍索不獲婦翁訟婿殺女婿不勝榜掠自
誣服云棄尸前塘中官使人求之果得尸獄成獨璞
疑曰殺人而棄尸非深怨者不如是也彼初婚方燕
好胡乃爾爾出囚謂曰爾辭信乎囚叩頭曰信速死
公之賜也屢問皆然璞計無所出乃齋沐焚香祝曰

此獄關綱常萬一其婦與人私其夫既受汚名又枉
歿於理安邪望天以夢覺我夜果夢人贈一麥字璞
思曰兩人夾一人也獄有歸矣比明械囚首令待時
行刑囚未出璞見一童子竊向門內窺璞令人召入
曰爾羽客胡爲至此得非爾師令爾偵某囚事乎童
子大驚吐實果二道士素與婦通見匿之槁麥中江
西人號曰斷鬼石在山西時議修堯廟一夕大風拔
木積廟前皆棟梁材後進工部尚書正統戊辰河決
滎陽經漕濮至陽穀入漕河潰沙灣東入于海命璞
治之河決口塞明年己巳處州盜起命璞討之平景

泰辛未也先寇獨石命璞兼大理寺卿往璞充餉勒
兵修垣守險 康定帝賜璽書曰爾忠勤善謀素爲
邊人信故命爾事平進太子太保改兵部尚書肉子
湖廣苗叛民李珍魏玄冲往爲用道之寇掠作讖文
湖湘訛言騰民用大擾又命璞往璞以計生得珍玄
冲檻送京師苗平還治部事數年致仕天順庚辰
英皇召大學士李賢謂曰石璞純臣也聞其尚健然
貧爲我以璽書召來璞至京 上召見文華殿璞服
青袍繫角帶入 上曰吾賜爾緋玉敝乎璞叩頭曰
臣平生以孤忠奮無結納今臣自分填溝壑矣詔至

臣自知亾他途必臣有罪當誅譴耳。上說是時璞
微贖乃命掌南京都察院事成化初致仕歸五年卒
後渠子曰銑正德初奉旨充孝皇實錄叅對官見
國史載石公功今求諸其家亾有也長老道公數事
載之足見其素槩石公在山西其夫人與諸僚妻燕
歸愠曰彼多金珠綺采吾布裙襖甚不稱布政妻也
石公曰爾何坐曰席首石公曰使吾墨于憲汝安得
居此坐且吾素不以妻子故宦彼金珠綺采者後欲
居汝席得乎明年其夫果有以墨罷者石公自司馬
歸彰德無宅第假太僕行署居後竟不能治第有司
令其家納金以行署長歸之于少聞城西孫平村高
平渠南有石向書別業已卯春始過焉傍畔作屋三
楹痺甚且閭屋左茅舍垣內僅一畝予訊其老僕屋
卽公居蓋瓦則易之屢矣公歸買田僅百畝其孫貧
四十畝售朱氏安陽某自典史歸石公許往其家盛
治具几上陳銀鹵前列金杯十餘公見之問曰爾宦
幾年曰未一考也曰胡歸乎曰刁民誣吾貪奪職石
公曰使吾治爾爾焉能還鄉里哉拂衣出

南京都察院左都御史黃紱

實錄

南京都察院左都御史黃紱字用章河南封丘縣人
正統十三年進士授行人陞南京刑部員外郎晉郎
中成化九年陞四川布政司左參議督松潘糧餉兼
理兵備十四年轉本司左參政歷陞湖廣左布政使
一十二年遷右副都御史巡撫延綏增置建安等堡
邊墻及移置驛傳拓教場地人皆利之弘治三年超
陞南京戶部尚書四年改南京都察院左都御史掌
院事六年疏請致仕許乘傳歸未行而卒訃聞賜祭
葬如例紱性嚴急不容物遇事輒徑行已志無所顧

慮然所守有可取云

南京都察院右都御史金公澤傳

金澤字德潤應天府江寧縣籍先世浙江寧波府鄞縣人中成化丙戌進士七年授刑部雲南司主事十年陞湖廣司員外郎十二年陞四川司郎中獻獄明允十三年丁憂十六年補南京兵部職方司郎中屢著才幹十九年陞四川右參議二十三年陞右參政播州宣慰厚饋以金幣毅然麾之至以庶長奪嫡竟寘之法革三長官司撫安七十二寨夷民駢首歸命流賊李廣蝟聚五千餘人戮通江官吏傾其帑藏東鄉王伯榮效尤犯順焚蕩縣治澤前後設畫偵其渠

魁而殲之銅梁新設民多負固撫循有方咸帖帖服
夔賊野王剛鼓衆猖獗充斥湖陝 上命三省督兵
會勦澤下重賞之令竟磔剛于市弘治五年陞廣東
右布政使七年轉左時汀漳盜起郡縣有司無遠略
不急補其勢寢熾而嶺南湖湘之不逞者從而和之
四散剽掠劫富室燔民居掠帑藏殺官軍闐然爲東
南郡縣患有司始駭而圖之備其東則發於西掠其
南則竄於北八年八月時鎮守江西太監鄧原暨巡
按監察御史都布按三司議以爲盜之未平以政令
不一而鄰境有司不肯協心故也宜設巡撫憲臣置
司要地以節制之而割附近郡縣以隸之則盜易平
也廼具奏其事 孝皇俞其請因陞澤爲都察院右
副都御史俾巡撫江西澤奉 勅撫定便宜從事先
榜令自首乃嚴督緝捕斬賊首滿天明等八百餘顆
論功罪明賞罰人多感奮思效猺獠洞蠻聞風向化
四邊以寧又因四省交錯緝捕官員責不專一每有
警急事難責成先該鎮守江西太監鄧原奏行將雩
都會昌信豐瑞金安遠石城龍南七縣各添設主簿
一員專一捕盜惟廣東韶州府五縣惠州府七縣南
雄府二縣福建汀州府八縣湖廣郴州五縣江西南

安府二縣建昌府四縣贛州府三縣俱未添設機快
捕盜無律盜賊縱橫無忌又奏行將前各府州縣不
分全設裁減州添判官縣添主簿各一員並不別差
專委操練機快緝捕盜賊遇有緊急調用責成又瑞
金縣招集鄉湖陂山場去縣六十里僻在一隅俱係
深山險洞林木森陰先年強賊藏隱在彼打劫石城
縣殺死人民丙辰澤具奏於湖陂山場設立巡檢司
一所又檄下撫屬設立關隘僉編附近居民之壯者
防守要津禁遏奸細後各縣因地方險易不同道理
遠近亦異而有所增損然莫非阻迹前意也又增高

贛州舊城一尺并信豐興國南康永寧舊城圯破俱
檄修葺又創巡撫院并贛州府贛縣學校俱檄重建
凡百政令皆行之可久而無弊者十二年陞南京刑
部右侍郎十五年改南京兵部右侍郎十八年陞南
京都察院右都御史掌院事正德元年致仕

南京都察院右都御史謚莊簡熊公繡傳

劉瑞

熊繡字汝明其先江西豐城人四世祖以下始占籍湖廣寧遠衛自幼穎敏不凡年十四補道州學弟子員成化乙酉以禮經領湖廣鄉薦丙戌成進士丁亥除行人奉使楚府及巡禁四川茶課上官一切餽遺雖一扇不受士論多之辛卯除貴州道監察御史立朝謇諤有器識凡百論議務持大體略苛細奉勅巡河風聲丕振一日過廣平寒甚借守一裘後還之守以鄉里故新製一裘遺公公辭以三不當受而竟却

之他日白沙陳先生聞之亦甚以公爲當也乙未巡按陝西發姦擿伏無所假由是貪夫斂跡右布政使干璠贓迹敗露棄官宵遁公遣人追之急璠遂遣子誣公他事逮至京卒無驗璠落職璠所親當路力主謫公知清豐縣陝民訴冤於朝者數百人在縣殫心民瘼不事逢迎均徭薄斂立衆輕歲給之法常單騎巡行鄉社等第其民戶高下凡貧老歿無依者悉爲之殮葬一縣化之

西大侵父子相食適鳳

翔缺守難其人吏部

失父母六月履任三日而雨是歲遂登郡大治先是

公巡按辯一疑獄其家繪公像報祀聞公至持以見公遣之弘治庚戌陞山東布政司左參政癸丑轉本司右布政使甲寅陞都察院右副都御史巡撫延綏地方公盡心邊務威名大著虜人不敢犯邊者久之丁巳滿三年考得貤封二代適母夫人龍氏卒于官所公扶柩歸葬道州庚申起伏陞兵部右侍郎甲子轉左公性剛方清介與人寡合而人亦未嘗敢以私干大司馬劉公大夏甚器重之凡邊情重務必與公商確而後行常奉命清騰驤四衛勇士得其虛冒糧餉者幾萬人由是權貴皆銜之時

宗敬皇帝勵

精圖治召二三大臣商治理劉公洎右都御史戴公
珊尤被親近而公與焉未幾 敬皇帝上賓衆嫉公
因舉公爲右 御史出撫兩廣蓋遠之也旣而劉公
亦乞歸公至廣首征獍苗之負固者餘皆以恩撫之
地方悉定舊例供應甚厚公一切裁革日惟廩給數
升而已正德丁卯逆瑾用事密使人踪跡公其人回
嘆曰熊某廩給外無一毫過誤可指吾且奈何瑾竟
不能害乃取公南京掌院尋令致仕公歸之日雖紙
筆藥餌一無所取朝廷以公先征賊有功賞以金幣
瑾賊輩怒不已乃以大同氾爛布豆爲公巡撫時事
罰米五百石責公親往輸公至舊屬爭欲代輸而
皆力辭自是家居閉門觀書不預人事不入官府
里亦不敢干以私澹如也公平生簡直清白臨事不
執無所牽畏而恭謹謙退未嘗自怠居官恒恥于薦
常曰我心不敢違理如父母在上教人只以存心爲
本所親爲置廳事稍寬終身不悅居家未嘗置產業
自奉甚約惇孝友兄子女公爲婚嫁者數人乙亥四
月忽一日左足涌泉穴痛遂自驚曰我雖精力尚強
恐旦夕不測身後慎勿援恩例乞祭葬俗禮不可者
禁毋行閏四月二十三日終于正寢年七十五公歷

官四十三年致仕者七年始終一節前巡撫湖廣右副都御史秦公金上其奏贈公南京刑部尚書賜祭二壇給二品葬仍以嗣孫瑞補廕後用前太僕寺卿何公孟春疏謚公莊簡仍月給卹孤米一石

南京右都御史張鼐傳

實錄

南京右都御史張鼐字用和山東歷城縣人成化乙未進士授襄陵知縣擢監察御史 憲廟末年數言官鼐疏諫不報又嘗論妖僧繼曉術士鄧常恩輩左道惑政會吏部尚書尹旻敗鼐以同鄉坐累謫郴州判官弘治庚戌起爲河南按察僉事歷副使參議陞右僉都御史巡撫遼東正德初巡撫宣府尋召入院陞右副都御史兼清理軍職貼黃會章丘知縣嘗殺犯賊當革職寧海衛軍沈洪殺人當抵死皆重賄逆瑾欲爲辯明鼐執不可瑾怒乃陞右都御史令掌

南京院事比去大學士焦芳之子黃中欲強市其居
與其黨通政參議魏訥龠不從芳亦然之僅旬日以
遼東汜爛倉糧事喉瑾矯詔逮繫龠罰米二千石三
年方事竟禡職瑾敗 詔復其官而龠已卒矣時正
德五年八月也至辛巳 今上御極 詔瑾時守正
被害者畀卹典乃賜祭葬如例

南京都察院右都御史劉洪傳

實錄

劉洪字希範湖廣安陸州人成化戊戌進士授陽蕪
縣知縣徵爲御史陞浙江副使廣東按察使都察院
右僉都御史巡撫貴州四川尋陞右都御史總督兩
廣入掌南京院事守制歸正德十年二月卒于家詔
贈刑部尚書賜祭葬洪儀觀修整性度醇實與人言
表裏洞達巡按得憲體在貴州時米魯餘黨煽亂洪
劾守臣之邀功開釁者乃帥兵討之在四川松潘夷
弗靖洪申嚴法令邊人賴之以安在兩廣潮惠二府
獯賊出沒爲患洪出師俘馘甚衆兵部尚書劉大夏

常以正大薦之

南京都察院右都御史張公琮傳 陳沂

張資政公諱琮字廷獻別號惕菴其先蘇之吳縣人
國朝洪武初徙閩右占應天江寧籍曾大父豫以子
學士文僖公益貴贈行在中書舍人曾大母倪封太
孺人大父晉以公貴贈通議大夫都察院右副都御
史大母孫贈淑人父翺贈資政大夫南京都察院右
都御史前母高母李贈夫人公生於天順癸未七月
二日公自兒時凝重寡言笑未冠爲府學諸生不狎
於衆人亦憚之而文日有名成化丙午舉應天鄉貢
弘治庚戌登錢福榜進士癸丑授工部都水主事管

理清江提舉漕艘事者曰一自防百不足理也公笑曰自防者分也無所理事何以集成漕艘之法古莫善於劉晏吾且法之踰年數千艘成丙辰改禮部儀制主事壬戌進郎中部事至是始專而績始顯癸亥冬孝皇不豫免長至賀東宮親王如故事公請於尚書曰未有天子不豫而王受賀者太子侍膳問安禮亦省已而命下如所議占城國王請封制冊封夷王給事中一人往將命占城遠在海外人憚于往六科倡議止之疏不絕上尚書不能決公曰封而告不以封天王之命討去矣禮先告哀而後請封國無訃命將誰與以是詰之威信其庶幾乎卒從公言武皇卽位大喪大慶大婚耕藉幸學諸禮悉如制而小變之皆著爲令晉藩有奪王封者時逆瑾受賄勢凌有司莫不傾靡公獨執不可瑾曰一郎中力能勝尚書耶吏部出公爲陝西參議奪者卽如所請而公坐貶京中語云鐵漢去矣如禮何丁李夫人憂歸正德庚午服闋左遷爲濟寧知州州苦於要衝日費錢數萬公裁省十之八所過卽權力者斂跡而去在州二十有八日改山東道監察御史巡按甘肅時方討安化之叛餘亂未息實投之艱危公恤無辜

治有罪安輯邊氓遠逐夷虜獎誘忠勇舉用賢淑懸賞耀威而腹心效順矣一日視虜刃曰吾南方一刃千牛而不改劔此何藉以刺人耶擲之地下虜吐舌大驚呼太師爭獻牛羊酪爲壽曰太師其神乎疆圉乃靖辛未瑾旣誅晉正王封嘉公之執擢湖廣按察副使兵備鄖襄蓋當河內陝右三路之衝流民盤據爲城社公綏順攘逆示以大信行以大法有稱浮屠淮誘者聚衆數千人僞爲符璽僭自稱王大亂將作郡邑動騷諸監司議請兵討之公曰此特縛其首耳咸謂大言公召勇士數人拆其巢獲之且諭衆曰茲謀非汝等所知法不及汝衆駭散逐定乙亥擢貴州按察使嘗兼布政都司事邊氓夷落戎衛諸種規模一新以勞動有金幣之賜丙子擢四川右布政使戊寅轉左布政使時舉松潘兵取宮殿木軍餉夫役之勞費甚多方郡縣告困而內豎劉允適張西竺迎佛事所過閭閻殘廢聲絕雞犬公意輸以近儲挽以津人迎以僧徒省其煩紓其疲裁其冗沮其勢議上中丞大悅事就而民免于俘蜀人曰不圖今日復見張益州也松潘平朝廷再下金幣之錫己卯奔父喪歸辛巳服闋冬補廣西左布政使明年壬午爲今上

治有罪安輯邊氓遠逐夷虜獎誘忠勇舉用賢淑懸賞耀威而腹心效順矣一日視虜刃曰吾南方一刃千牛而不改劔此何藉以刺人耶擲之地下虜吐舌大驚呼太師爭獻牛羊酪爲壽曰太師其神乎疆圉乃靖辛未瑾旣誅晉正王封嘉公之執擢湖廣按察副使兵備鄖襄蓋當河內陝右三路之衝流民盤據爲城社公綏順攘逆示以大信行以大法有稱浮屠淮誘者聚衆數千人僞爲符璽僭自稱王大亂將作郡邑動騷諸監司議請兵討之公曰此特縛其首耳咸謂大言公召勇士數人拆其巢獲之且諭衆曰茲謀非汝等所知法不及汝衆駭散逐定乙亥擢貴州按察使嘗兼布政都司事邊氓夷落戎衛諸種規模一新以勞勩有金幣之賜丙子擢四川右布政使戊寅轉左布政使時舉松潘兵取宮殿木軍餉夫役之勞費甚多方郡縣告困而內豎劉允適張西竺迎佛事所過閭閻殘廢聲絕雞犬公意輸以近儲挽以津人迎以僧徒省其煩紓其疲裁其冗沮其勢議上中丞大悅事就而民免于俘蜀人曰不圖今日復見張益州也松潘平朝廷再下金幣之錫己卯奔父喪歸辛巳服闋冬補廣西左布政使明年壬午爲今上

嘉靖改元公始蒞任數月拜都察院右副都御史以節鉞鎮湖湘十有八郡實承撫綏之命兼贊理諸軍事時黃鏐造逆劉召爲亂丁爵萬明福倡妖于德安李全伯作孽于襄陽隴政阿核構叛於苾部荆襄大饑漕河運艱告乏凡七下簡書酬應不暇公調遣諸兵召令郡吏相其難易緩急咸授之以略限之以期決之以機次第舉之皆不踰年而悉平所賑飢民用青州法因時小變民免於死亾甲申進南京工部右侍郎候代境上乙酉改南京刑部公家南京素無狎比者門無私謁雖葭莩之親有犯不敢以厚望公有

富者之喪數援姻家枉公以弔公曰生未識安弔

卒不能致丙戌晉南京都察院右都御史諸臺謁公

曰朝廷之法執於御史執者廢法將安歸惟寡交游

則無私謁少宴會則無請托皆惴惴而退鮮不憚者

遇考劾首黜不法者數人六卿皆不敢以屬吏自比

公轉官自刑部皆居公署諸子在私第非召不敢至

門可雀羅己丑乞休疏凡四上始得請 上甚難之

命有司歲供夫役月給廩以優其老庚寅九月三日

以疾卒于私第之正寢年六十有八訃聞 上悼恤

賜葬祭有加配倪氏封淑人性婉順無犯公所不悅

者子男七人恕舉鄉貢愈蚤卒志郡學諸生愆廕補
國子生恩憲恚皆能服公之教出入皆徒步一力隨
之無越禮者公筮仕四十餘年惟故廬數楹至貳卿
始易居亦不崇廣致政後始置田頃餘不能歲給焉

南京右都御史何文定公瑋傳

張鹵

公諱瑋字粹夫世號爲栢齋先生其先揚州如臯人
洪武初有忠一者以總旗從天兵北定中原歷河南
懷慶衛編管三傳至森配劉氏以成化甲午十月生
公於武陟縣千秋鄉屯舍公生而端凝不事嬉戲人
以爲痴七歲時入郡城忽見彌勒佛塑像 抗言請
去之人皆大駭十歲讀書十九爲郡庠生必 以聖
賢之學爲學嘗曰許文正薛文清二先生世未遠而
居又甚近于此忘所師法學其謂何故于一言一行
必求聞于父老力索于遺書有得則欣然忘寢食而

從之弘治辛酉河南發解第一壬戌登進士第改翰林庶吉士嘗爲閣試克已復禮爲仁論有曰仁者人也禮則人之元氣而已見侵於風寒暑濕者也能無爲邪氣所勝則元氣復元氣復而其人成矣識者謂可與程明道顏子所好何學論相比方成化以前文章以懷麓堂爲宗匠至是人頗厭其纖靡而競爲復古之業公曰文章不逮古昔固爲要切而人心尤甚乃獨務已舊所謂學以要其必至甲子授編修丙寅 毅皇帝踐祚公因新政抗疏乞復史職不報戊辰同考會試己巳 孝廟實錄成晉修撰時逆瑾煽

虐烈焰如焚一日瑾贈川扇子諸翰林諸翰林有入而跪見者公獨長揖瑾怒亦不以贈頃之受贈者復相跪謝公傍正色曰何跪而又跪也瑾大怒詰其姓名公自前對曰修撰何瑯公知必不爲瑾所容乃累疏謝病得致仕歸庚午瑾伏誅辛未復公原職時四方盜起公入朝獻時政論三篇又爲兵論五篇以貽執政又疏請籍沒賊吏以杜禍原皆議格不報癸酉以經筵觸悟忌諱謫同知開州爲三比法以均賦役督修黃陵岡堤岍能使子來之衆以日易月晉東昌府同知再乞歸旣歸居城南別業八年杜門却掃不

接外事壬午 肅皇帝嗣位起公爲山西按察司提
學副使以父憂不就癸未再起浙江提學至則抹殺
舉業捷徑華靡之習務敦尚本實士風丕變未幾晉
南京太常少卿時甘泉湛公爲祭酒杏東郭公爲司
業公力與修明古大學之法其贈杏東之言曰古之
君子何爲而學也以修齊治平而學也則當務之急
固在身如何而修家如何而齊國如何而治天下如
何而平細而言語威儀大而禮樂刑政此物之當格
而不可後焉者也博學而審問焉慎思而明辯焉一
旦卓有定見則所謂物格而知至矣由是而發之以
誠主之以正然而身不脩家不齊未之有也大學之
道如是而已矣至究其本原爲性命形於著述爲文
章固非二道特其緩急先後各有次第不可紊耳今
之君子不察乎此刻意詩文則曰立言不朽此豪傑
之所以名當時而傳後世也留心性命則曰無極二
五窮神知化此大儒之所以繼往聖而開來學也至
有僞起捷徑之學者則又曰理出於心心存則萬理
備吾道一貫此聖人之極致也奚事外求噫爲是論
者皆天下豪傑之士也吾豈敢謂其不然哉特恐其
修齊治平之道反有所略則所學非所用所用非所

學於古人之道不免差矣又贈兵侍陳公有曰嘉靖
改元石峯先生以右副都御史巡撫江西明年改南
京大理卿又明年改南京兵侍予於是有感焉古稱
才難全才尤不易得唐虞之際命官九人固皆極天
下之選也然而興禮興樂掌教掌刑皆久于其職有
終身不易者豈非以其才性各有所長職業各有所
習兼全之難故也至于內總百揆出總六師土地山
澤無所不掌惟禹益爲然全才之不易得如此近日
當道用人司錢穀者未久復改之典刑獄職風紀者
未久復改之司民牧計資遇缺而遷初不問山所長

所習無乃以全才待天下士乎其意良厚矣所慮
才不可多得用違其長則王良操弧后羿執轡非惟
無成且以敗事是故不可不深長思也時人稱爲留
京兩篇文字丁亥晉本寺正卿再晉南京工部右侍
郎奏革神帛堂各宮監機戶夫匠料銀歲省以數萬
計改工部未幾改戶部時儉菴梁公爲大司徒二公
一時冰蘖清操真足以廉頑立懦官府舊習積弊皆
湔滌無餘再改禮部再謝病歸遂爲終焉計會御史
毛鳳韶等累疏乞留謂斯人不可使一日去國詔許
在京調理又晉南京都察院右都御史掌院事竟不

復就是時南有王陽明北有許函谷皆以理學名于時而公獨默如日事二親躬營菽水率其家之子姓及鄉閭後生以脩孝弟忠信一介非義取與不入于衡茅雖其茅屋數間僅蔽風雨薄田百畝聊供饘粥日與其父母妻孥怡然順適若廣厦萬鍾而不復知世間之有榮貴也兩執親喪皆哀毀頓歿若不能更生居常非涉日用躬行者絕不形于言門人有問太極陰陽之說者曰只以伏羲八卦橫圖豎而觀之則易之所謂太極動靜之所謂有常更易簡可見而周子可無事於圖矣有問律呂之說者曰只以舜典詩

言志歌永言聲依永律和聲十二字而驗今俗樂之詞曲及唱詞曲時必次竹彈絲相應與夫宮尺上工合四爲版眼之遺法以求之至明白可見而蔡氏可無事於新書矣有問一貫約禮之說者曰儒者未得游夏之十一而議論卽過顏曾以聖賢心法爲初學口耳此道聽途說之最可惡者門人婁樞王西星嘗請梓公文錄公曰聖賢之道昭在六籍如日星後學愧不能知而行之自宋以來儒者之論方苦太多此吾之所深懼也故惟均復糧二論家譜家訓二篇儒學醫學管見皆切世務者門人因得哀集之有贊公

者曰先生真可謂銖視軒冕塵視金玉者公曰此後世儒者輕世傲物之論也金玉自是金玉如何塵視得軒冕自是軒冕如何銖視得此何異於老莊芻狗飄瓦西星輩曰如是孔子何以謂富貴如浮雲曰不義而富且貴於我如浮雲浮雲在不義不在富貴也家居十餘年薦揚者二十餘疏嘉靖二十二年九月夜半有星隕于郡城西流光如晝是夜公疾革卒年七十訃聞詔賜葬祭隆慶初詔言官舉先朝應得恤典諸臣鹵時叨諫恒乃上章特爲公請給贈謚上素重公名乃特恩賜謚文定贈禮部尚書

士林稱大快云

南京右都御史王公爌傳

京學志

公諱爌字存約浙江黃巖人弘治壬戌進士授太常博士每遇郊祭衆率宿食郊殿公病其褻獨宿於館次日衆被逮公獨免人謂公筮仕輒卓立如此擢工科給事中正德初轉刑科都給事中疏勤政務惜老成專委任三事時中官多橫侵凌縉紳而御史林有年僉事韓邦奇咸以駕帖被逮公言錦衣乃扈從爪牙之寄駕帖非尋常勾攝之文必重急而後用之今不問巨細虛實一槩施於林有年韓邦奇骨鯁之臣非盛事也丁丑當大辟駕幸北園當事者謀取遙

旨快私臆公特疏請停刑還駕謀乃寢公疏皆人畏縮不敢言者竟以忤中貴傳旨謫惠州府推官攝府事積羨累千金悉委不取擢廣信府同知嘉靖改元以科道會薦復刑科都給事中尋擢太僕寺少卿改太常擢應天府尹府賦徭繁重富人多投內監神帛堂以避而積累貧者公爲革織匠百八十九戶竹匠百六十八人銅匠三十二人守庫百二十八人部薪夫三百十有六人裁齊庶人之供億節中使之浮餼籍記縣司丁錢使諸司不得恣取冗費爲之一清他如議罷京邑種馬議發內帑絲織神帛議輕荒稅蘇流亾議料田出賦均貧富疏數十上皆不避嫌怨爲之一時困者起流移者歸而公之頌聲滿京輦矣又以其間拔諸生異等者躬課之郡齋自是掇巍科躋聽仕者甚多皆公教也丙戌陞南京刑部侍郎以母春秋高疏乞終養詞引李密事甚哀荷 兪旨回籍則太夫人疾劇不食五日矣聞公歸喜甚尋就康衆謂公孝感所致三年母壽九十五而終起復原職土豪王冠家僮數百人陰購初生嬰兒剝粉爲延年劑且廣結權貴事發爭爲求脫竟按罪論歿畿民稱快六載考績渡江大風覆舟浮沈百餘里會海山採薪

舟回以巨斧破舟底出公時公愈甚有司請就行臺
公曰我去則舟中人誰與出之乃盡出之而後去其
年擢南京右都御史舊內守備進表取御史兩人監
禮公曰中人行禮奈何輕用朝廷耳目官乎執不與
奉表北上大學士夏言藉寵傲物京堂官率多隅坐
公獨據正席且贊惟一幣夏滋不悅因乞骸骨以歸
公仕餘三十年所論薦多當世名流性不能隨俗俯
仰至於升沉利鈍視之泊如平居恂恂若無甚可忤
至臨大節決大疑則毅然不可奪有京兆遺愛錄傳
于金陵士民建生祠祀之於聚寶山側

資善大夫南京都察院右都御史端公廷赦墓

志銘

顧應祥

嘉靖三十一年秋七月二十有三日南臺御史大夫
虹川端公卒于官 上聞賜祭二壇命有司治葬如
制公諱廷赦字世恩別號虹川先世本衛人孔門第
子子貢之裔今獨稱端者省文也其詳載宋潛溪學
士端木府君墓誌中元末諱邦達者避地當塗遂家
焉生以良以良生厚封監察御史厚生宏天順己丑
進士仕至浙江左布政使宏生文用公之考也以公
貴贈都察院右僉都御史妣唐氏封太恭人公生而

岐嶷不凡方伯公甚鍾愛甫再暮失怙方伯公居官清白無遺蓄太恭人竭力訓誨學乃大進丙子領南畿鄉薦庚辰南宮中式武廟南巡弗及廷試明年辛巳今上登極始廷對賜進士授高安令高安素稱難治令俱被累弗克終公不事鞭朴庶務畢舉督造版籍剔弊殆民勒石頌之召爲監察御史首劾武定侯驍橫不報然貴戚斂手畏之奉勅巡茶馬于西陲劾去貪墨者數人風裁益著巡按兩浙浙爲東南巨藩錢糧刑獄俱關白而行公裁決無滯人服公才事竣回掌道事行人薛侃上書請如宋仁宗故事擇宗一子育於宮中疏入逮鞫朝堂有朝士希進者傳致某官主使薛被考掠竟無所指法司阿意偏向公具疏白之人益直公公亦以此遭忌尋遷大名府知府後二年轉陝西苑馬寺少卿公逆知不爲人所容遂致其事而歸未幾臺諫交薦起爲遼東行太僕寺少卿遼陽去家五千里公以太恭人故不欲行太恭人不可乃之任尋轉河南按察司副使兵備信陽地接三省民多流竄時河內大凶公開倉賑濟全活甚衆大司徒王公上其事天子嘉獎三載轉湖廣布政司右叅政召入爲順天府丞甫半載陞右僉

都御史巡撫山東值邊境多事調發輸戍供億不貲
公悉心料理民不困乏經冬無雪民心皇皇公乃躬
詣泰山竭誠以禱雪乃降晉左副都御史協管院事
時礦賊未平聞太恭人訃墨衰畢事奔歸當道有嫉
公者諷言官劾公皆無稽之言公竟不辯服除事益
白以原官巡撫河南鄭王與其宗支訐奏陰私朝廷
遣內外大臣勘問事皆倚於公適北虜犯闕集兵入
援交併一時賴公以定轉戶部右侍郎尋轉左總督
太倉大苑壬子轉南京都察院右都御史掌院事
有大俠善結納要路侵害客商公擒治之以正典刑
錢法濫惡出令禁治中外凜凜咸望公大有所爲而
不虞其止是也于七月感疾卒詎生弘治癸丑年六
十以嘉靖癸丑葬於金山之原

南京都察院右都御史海忠介公瑞傳

京學志

公名瑞字汝賢廣東瓊山人以鄉舉爲南平學教諭初至謁上官止長揖曰吾師席也可屈膝乎因著論云孟子言爲貧而仕者非也抱關擊柝委吏乘田無在非道而尤莫如教職蓋人材所由造世運所由理其職亦何尊且難乃稱爲貧哉自世治此說不察故居此官者多媸媸不舉其職士習蠱而吏治媮所從來矣持論若此尋進淳安令淳巖邑也地瘠而民嗇所產茶竹杉栢外無他物且重崖複嶂民易逃匿山下田畝悉歸右姓窮民卒歲不粒食又當新安下流

諸官舫日五六至夫役迎送費不可支公覩民窮慨然思拯之初入署例有燕公第以祀神牲草草治具乃召丞尉若學官弟子若耆老以次列備陳所爲奉法字下意甚悉竟日散去淳安人固沾沾知令志有在矣無何度田定稅不使貧富得上下其手官署中有隙地課老僕樹禾麥秬蔬芥旦夕取自贍自江水外無關淳安者胡公宗憲總制浙直權甚重家僮過淳安公無加饋胡一日語潘臬曰昨聞海令爲母壽市肉二斤矣蓋笑之也豐城鄢懋卿由中臺出理鹽政勢張甚所至縣令如上供以得無叱辱爲幸維揚

三臺使醪燕之費千餘金鄢將往徽齊雲牒所過郡邑供辦令甚峻及淳安公乃爲書上鄢甚言邑小不足奉迎願取他道往且言汰侈不可爲與小民不當虐也甚具鄢得書色變久之遂罷齊雲行曰令言是也潘臬郡守聞之股慄曰令何戇幾累我輩矣公時已晉嘉興別駕鄢私人御史袁迎鄢意以他事摘公從舊職論調興國興國地故單薄歲賦不入民苦浮糧爲患公述八事上之中丞而獨亟清丈以蘇貧民而均其賦已陞戶部主事時肅皇帝尚玄脩朝政多曠公慷慨言天下大計謂興土木爲傷民數推廣

事例爲鬻爵以師陶仲文爲非禮以仙桃藥丸爲怪
妄甚者以不見二王不還大內誹謗猜疑僂辱臣下
爲薄於父子夫婦君臣其言皆敵以下所不能堪者
上震怒之章于地已徐閱之意若爲動者畱踰月
而會 上意有所不可遂下公詔獄中外縉紳
相顧失色而公直聲亦遂聞天下亾何 肅皇帝崩
莊皇帝奉遺詔出公獄還其官尋改兵部主事已進
丞尚寶丞大理南京通政入爲左通政遂以僉都御
史撫應天時公威名籍甚中外墨吏往往望風解印
去權豪怙勢之家率相戒毋敢犯一顯者赭其門以

居聞公至卽易赭而黜中人監造者以八人肩輿
見公亦減其半云吳故有松江滙震澤入海瀕江田
藉其灌溉已爲潮齧淤爲陸公斥羨募工乘輕舟躬
督畚鍤開濬之不旬月而成又吳俗貧富相傾弱者
率獻田于其豪以爲奸利輸不必入公獨卵翼窮民
而摧折士大夫之豪有力者是時吳中貴人無逾華
亭相按問其家無少貸而弟侍郎陟武斷殘民輒逮
治如律盡奪還其侵田自是士大夫之名貪暴者多
竄跡遠郡以避小民始忻忻有更生之望矣公嘗論
欲天下太平惟有井田一法井田之壞而不復也惟

有亟奪民田一言至於不得已而限田又不得已而均稅策斯下矣然猶爲井田之遺意故其令疲邑撫三吳皆以清丈爲急而力行條鞭一法令額外征徭不至重困之至今小民得保守田業相率繪公像而尸祝之比比也然公竟以奪富民田府怨而議者亦以此中公遂解官歸里居十餘年九卿若臺省前後薦公者無慮十餘疏今上聞公名起公南僉都御史旋以爲南吏部侍郎公至首陳治安要機謂今日貪墨爲姦決不可縱欲使百姓安樂當簡守令欲督于令當責成撫按與閣部大臣而歸本君身多責難

語疏奏

上深鑒其忠屢欲召用而柄地有陰沮

乃以爲都御史掌南院浹歲三遷皆出特簡海內端人舉手相慶以爲特達之知而小人之不便者顧目公爲迂闊詆之甚力章亦寢不下公屢疏乞歸上屢報聞竟以丁亥卒于官卒之日貧無可給棺槨士大夫醵金以殮士民哭公至罷市者數日祭于途累數百里不絕訃聞上震悼者久之贈太子少保諡忠介賜祭葬公在南都一意自約罷無名之賦其理根排枝梳剔弊垢見爲毛舉細察要以惠養元元母耗敗財用而裕其力蓋世人所視以爲迂而公以所

然以爲必可行者南都民故苦火甲夫差公力爲釐
正使官民不相擾爲簡可照煩冊以便遵守民若出
湯火而公意猶以未盡如京師法爲歉科條甫備而
公不能待矣惜哉

海忠介公瑞傳

王弘誨

今天下冠帶之倫其以賢豪自命者非少矣然往往
趣舍異路而言行相詭或借爲中行之說陽抑而陰
爲闢而不自知其竄入于鄉愿之中或見謂功業有
道途可指取有名節可戾契凌厲恣睢而苟爲高而
罔致嚴于簞簋之飾其平居之所慕說蓋稜稜若異
代人不可及乃其行事之概未及蓋棺而論定矣名
不虛立士不虛傳壯夫義士非其仁心爲質蟬脫塵
埴不畏義歿母榮倖生則胡以毅然稱大丈夫哉余
有感于忠介海公云公生於嶺南爲吾鄉之瓊山人
名瑞字汝賢別號剛峰其學一切以剛爲主其譚說
理道雅尚節槩非陽浮慕之而創爲名高者自辭受
取予進退以至拱揖遜讓居室食飲務畫地而趨媿
阿之態側媚之行絕不以緇於心而染于躬用世之
志老而不衰至縮胸儻葛驟而致通顯者則塞耳而
不願聽謀國之忠持已之介終其身斷斷如也自爲

諸生時卽抱當世之慮瓊世苦黎患每爲經畫區處
事宜始以計偕來伏闕上平黎策意在開導置縣以
免征勦守戍之苦識者相與壯之已而就吏部選曰
仕亦各官命耳何擇爲選而得教諭南平以倡明師
道爲已責首揭鄉愿忠信廉潔之似孟子不見諸侯
之守孔子申棖剛者之辯以廣厲學者而作其氣抗
學官禮於臺使者及監司使者務守會典憲綱獨立
行一意而已臺使者監司使者相驚嘆以爲古已遷
淳安令至則校講民所疾苦蠲除不俟日身自飯糲
糲羹藿僮從悉令樵採者俸之外無所取時相嚴黨

鄔某者以都御史制八省鹺政出行部張甚諸縣道
咸盛供帳爲敬懼失其意公挺然不爲動至按其生
事者聞於鄔而置之法鄔貌喜而心銜之公時陞嘉
興府通判矣鄔之私人某窺鄔意以他事摘公從舊
職論調興國地故單薄歲稅不入民苦浮糧爲患公
自爲七事上之中丞臺次第施行而獨急於清丈以
蘇貧民而均其賦已陞戶部主事時 肅皇帝恭尚
玄脩大小臣工率勉強道服從事公慷慨上言天下
大計謂今日君道不正臣職不明欲洗數十年君道
之誤則莫如以堯舜禹湯之治責君欲洗數十年臣

道之誤則莫若以旱夔稷契之輔責臣疏凡千餘言
多慨激 上震怒投其章於地已詳閱意若爲動者
留踰月不下會 上意有所不可遂下公詔獄中外
縉紳相顧失色亾何 肅皇帝崩 莊皇帝奉遺詔
以原職出公獄尋改兵部主事已晉丞尚寶丞大理
南京通政入爲左通政遂以僉都御史撫應天時公
威名籍藉中外墨吏望風解印綬去權豪怙勢之家
宰相戒毋敢犯公者吳故有淤江滙震澤入海瀕江
田灌溉弘多已被潮齧淤爲陸公斥羨募工乘輕舟
往來身自督畚鍤開濬之不旬月而告成又吳俗以
貧富相傾弱者率獻田於其豪以爲姦利輸不畢入
其俗日告訐無已公廉得其主者名斷擊無少貸悉
令受獻者還其田或許之贖不使富豪有侵奪名由
是吳賦無復迫負者蓋公嘗論欲天下太平惟有井
田一法井田之壞而不復也惟有亟奪官民田一言
至于不得已而限田又不得已而均稅策斯下矣然
猶井田遺意故其令疲邑撫三吳皆用清丈及令獻
鬻遠贖毋俾苦樂不相等爲安養生殖至計然公竟
以奪富民田府怨而議者亦以此中公遂解官歸歸
杜門時不能溫突意蕭然也交際所入以周族姻之

貧者邦大夫時過從問政纚纚爲言不少懈恥面諛亦罔及其私里居十餘年而九卿若臺省前後薦公者無慮十餘疏今上銳意太平起公南僉都御史旋以爲南吏部侍郎公至而疏乞骸骨行陳治安要機謂今日貪墨爲姦毫不可縱欲使百姓安樂其於守令務極選欲督守令先司道督司道先撫按而致望于閣部大臣及歸本于君身中多責難之語疏甫上而又有南右都御史之命浹歲二遷俱出特簡海內士大夫舉手相告以爲主上特達之知而言官某某日公爲迂闊詆公甚力章亦寢不下公疏屢報

聞竟以丁亥卒于官卒之日無一語及私貧無可給棺槨都御史王公率諸御史相與捐金治具訃聞上爲震悼命禮官議謚謚忠介且錫之祭葬存沒之賚於數爲優矣公之始至南都一意省約罷無名於官之可去者其理根排枝搔痒爬垢見爲毛舉細察要以惠養元元毋耗敗財用而裕其力蓋世人之所視以爲迂而公斷然以爲必可行者南都民故苦火甲夫差公力爲釐正使官民不相擾爲簡可照煩冊以便遵守民若出湯火而公意猶以未盡如京師法爲歉科條甫備而天不憖遺公已捐舍豈天不欲斯

世蒙仁人君子之澤耶悲夫當余官翰林時公以戶部主事言事自分必死過余談治亂興亾之事甚適又相與論文對酒已乃出二十金遺余囑之我死必以此殯我公今沒于南子姪兄弟無一在者而余職侍帷幄無能視含斂諾責之是媿獨計公之精忠大節所以傳不朽者固自有在而余以公意氣之交能道公之事其詳而且信者宜莫如余言故因友人梁君之狀而爲之傳云

贊曰海公者非唐所稱楊綰流耶方綰之相唐而大臣減音樂勲貴撤騶從方拜命而轉化乃爾此豈有聲音笑貌也乎哉乃海公之砥節礪行而縉紳又多遺議何也夫謂公意不可一世則可謂公無用於世則不可因其不可一世也而遂詆其不得用於世則又不可烏乎行爲國棟德足世儀惠以達名介而遠利剛標高碣挽我叔季若海公者吾不得而見之矣

南京都察院右都御史玉陽沈公子木墓志

孫 鑛

江南諸沈大都皆梁沈隱侯裔而歸安尤盛其最著者曰竹溪里南右都御史沈公歸安竹溪里人也諱子木字汝楠父應登選貢生歷官寧國鳳陽青州三府通判封工部主事郎中廣西按察副使贈通政使祖父鏊處士亦如封公贈曾祖父玘高祖父登仕郎輅其始祖子敬則初徙居竹溪里者也蓋在我明洪武時下至登仕公數世矣而贈銀臺公敦實行爲鄉祭酒至別駕公益顯矻矻好脩居官有惠政生五男

公卽長從同邑陳方伯應和受毛詩嘉靖戊午舉于鄉有族子鷺而忍受別駕公恩輒報以橫逆侵及丘隴公以甫獲薦不宜訟卽訟不可自宗人始惟曲以理屈之明年成進士慨然嘆曰嗟乎此吾涉世初也我先世修儒業勤生殖以作家至家大人始通仕籍然居常不忘韋布意常勗子木等去汰心毋効浮誇習子木日日心戒也且向者篝燈探往籍未嘗不以古賢默相質茲幸藉累世德獲登第正宜思所以遵嚴訓酬往志一失足則愈馳愈遠改步難矣乃先定志凡事俱從減損寓京師惟掩關讀書又兼讀律研

精法家言是歲選當塗知縣當塗太平附郭邑直指駐節地也迎送甚勞又俗好訟多逋賦公夷然以閑裕理之吏民安焉會景王之國所需不貲從闔又橫索守張某有心疾將箕斂于閭右以供公裂眦爭之乃已公又謂長史某曰王而體天子意者必軫恤吾民不使擾擾民非王意有私索者請奉三尺治之長史以啓王王曰此賢令也供張不乏久留此何爲卽日命從官揚帆去至池州王急索輦有司以江行無所事輦輦不具守惶懼不知所爲忽當塗以輦馳至乃王亦竟不用也守陳公應和故公業師公慮其

或有缺故預爲備焉辛酉歲大飢賑救有條民不知
無年壬戌擢虞衡主事領盛甲廠廠有中貴主之物
料半侵牟戎器具數而已公乃召工匠嚴諭之曰若
曹不覩庚戌事耶虜酋入寇甲兵不繕主者皆獲罪
若何玩愒乃親視器必期精好不中程者輒毀棄令
重治之中貴鉗口莫敢出氣癸亥虜果猝至通州禁
軍出禦敵戈矛弓矢之屬分給至十三萬有奇皆堅
利可用司空豐城雷公禮大嘉賞之曰此實心任事
者也使人人如此何職不舉丙寅遷都水員外郎是
時上居西苑離宮別館營建甚多公亦兼領上方

工作皆身拮据其間省水衡金錢萬計會河決徐

司空朱公衡董其役隆慶丁卯擢公卽中領南河晝
夜宿河上告成晉秩一級尋出爲建昌知府略倣古
循吏跡不尚威嚴郡有羅憲副汝芳講學著名時以
郡守家居公數駐車與談理又進諸生課經術月旦
其文稅自後登公車者多且居官多有名焉某邑有
富民死無子爭爲後者訟連年不已公以天倫勸誨
之遂交相讓卒歸之應嗣者鄉豪欲攘下戶業要人
數爲關說執不與兵憲某簞簋不飾與公不相中乃
反讒公公知之一日謁撫臺語次忽微詢曰監司若

何公曰甚善曰不與府齟齬耶曰安敢廢公然則道路語籍籍何也曰府寔無聞都憲乃莞爾曰公誠長者前此江右有洞夷警郡募健兒爲備多江北人久之議撤奉令者失調護諸健兒呼噪不散公馳單車諭之曰汝誠不畏死耶勁兵在近壤撲滅汝如踏螻蟻耳汝作數百橫死鬼痛矣今爲汝請九十日糧供衣履之費以行脫介冑返故土不亦善乎皆感泣涕下曰公寔生我遂羅拜去庚午冬入覲明年擢廣西副使領右江兵備而歛殷公正茂舊爲江西按察使素器重公時以侍郎總督兩廣聞公來甚喜每事咨

焉殷公在嶺東西功最多靖洛容寧柳城田八
府江率用公策柳州有懷遠縣寄萬山中四面皆獠縣令寓郡城遙領之不入縣而令馬希武者憇喜事妄議城焉公曰此示之疑也獠將生心而按院李公良臣與馬有連主其議城未半諸獠已警警譁馬猶不省謾爲大言無何患作竟殺馬令上震怒命急剿之而開府莆田郭公應聘重發兵檄府江還兵擊之故事土兵十月出師二月罷歸田作是歲爲萬曆癸酉檄至巳正月束裝待歸復驅之遠征已懷怨會道中又大雪沒膝乃粵中數十年未經者不勝苦遂

鳥獸散賊知之將奮力犯我同事者與公俱駐融縣去賊止三十里議棄融還公曰此引寇自逼也吾一退諸屬邑如破竹矣密期總兵平蠻將軍李公錫督指揮黃鸞率浙兵三千直趨長安鎮扼其隘口賊怖不敢出乃徐調諸營兵六千土兵三萬分道進剿仍戒毋妄殺遂連破七十餘砦斬首三千餘級獲故懷遠縣印戮其酋督府疏聞 上嘉之賜白金文綺晉右參政仍領右江未幾廣東征羅旁移公督戰窮其穴拓地千里丁丑擢按察使聞母陸淑人訃奔歸仍以羅旁功晉右布政使庚辰爲忌者所中貶秩候調

明年補湖廣右參政督轉漕漕舟舊待兌漢口有風波之險公移置會城軍民便之甲申晉按察使會詔下籍江陵家一時承望若多苛求公獨持之曰賊貴得寔彼行事雖多不善然安可懸坐諸公不愧又遼庶人罪廢乘此欲歸獄江陵冀復國公奏記當路曰遼庶惡自宜滅國非故相以私憾傾之也故相破家不枉然不可執此伸遼謀遂寢識者壯之乙酉遷山西右布政使丙戌轉左晉中大飢公放鄭俠繪流民圖奏上得捐帑全十萬爲賑因命吏治粥以飼餓人全活者甚衆丁亥晉右副都御史撫山西督雁門

等關軍務會虜王灰子當嗣封乃故桀鷲不肯俛首
來徘徊境上或擁鐵騎馳驟若戛挾然衆皆疑虜盟
將敗喜事者多謂宜遂絕之修戰守公曰是安可輕
易重餌在此夫將焉往姑徐之當自就我銜轡耳已
而果然晉宗室多不法陽曲有三四鷲虐者爲之魁
略民間子女奪財產不服者至用火炙蝎螫等毒刑
刦之公請於 天子置之法惡宗斂迹撫晉三年緩
鞭朴戒浚削植羸困抑豪猾敦節儉下吏肅然其飭
邊備則修障殖穀明賞申約復屯政通鹽利清尺籍
作上氣除戎器事事覈寔制府上其功賜金綺者三

入爲兵部右侍郎以父年及耄亟歸省甫三月封公

病卒守制家居辛卯閱視給事中有言調南京用晦

以丘壑者八年己亥起南京太常寺卿閱掌故見

懿文太子四時有祀痛 建文君獨無祀乃草疏曰

皇上以孝治天下殆三十年欣承祖宗諸盛典無不

釐舉獨 建文祀久闕未有言臣竊謂 建文君

高皇帝孫 懿文太子嫡長子五年御宇統順系明

卽當 成祖時且用先臣王景之議以 天子禮葬

遣官致祭輟朝三日則 成祖之不欲廢其祀可知

也相沿至今藐無成說生爲金潢玉牒之主沒銜斷

蓬飛草之怨若敖舍餒伯有無依不亦悲乎 皇上
御極初年特念死節諸臣下褒祀之 詔伏讀制詞
有曰仰遵 聖祖遺意褒表忠魂夫忠于 建文者
且祀矣乃 建文獨不得祀耶弘治時禮部主事楊
循吉曾以 景皇帝爲比議追謚夫謚且當議則祀
尤宜急議今世所疑者不過謂倫次間稱號難定是
不知禮以情伸數緣時降第獲螭螭一俎猶愈於湮
絕弗存者臣愚以爲畱都誕育之區臨蒞之地生所
憑依魂魄不遠宜卽其處或祔于 高皇帝之側不
則 懿文太子側廟祔弗淪儀典斯秩 累朝未備

之禮今日集其大成 列聖未慰之靈亦將懼慚交
鬯于 皇上之善繼述矣疏具將上會 青宮冊立
少待辛丑轉通政使至都卽奏上之下禮部議如所
擬覆上不報然時論避焉在納言七年封駁惟允時
中宮四出漁利而爲牙爪者復多蝮螫封事十九寢
不下諸司日行疏亦遲留不如期大小員缺多懸不
補河工告急水衡之見金公從部院後每遇災異皆
上疏極諫不報乃引疾乞歸數十請未得允至戊申
通前三品二十三年實在職十二年 詔從吏部擬
晉南右都御史公去志益堅稱疾歸里日與親知置

酒為樂康強不衰已酉八月邁脾疾卒距生嘉靖戊子十月得年八十有二公貌魁梧昂然挺立為人慷慨多大略汪洋千頃莫可涯涘居官不上虛聲所經畫皆久遠計崇理學工文辭有著述數種藏于家事繼母孝弟子禾同母子來子采子杲異母皆怡怡和輯之待諸妹有恩養居者分財濟焉既貴敦舊交如平生嘗謂諸子曰石韋柳竇以簪紱世其家至今閭巷傳之乃功業不少概見然則不朽者徒青紫哉汝輩勉之無以科第自多公生四子儆炤大名通判儆序南工部郎中儆炳福建右布政儆烜貢生

南京都察院左副都御史邵公玘墓碑

楊士奇

公諱玘字以先姓邵氏其先居睦至仁仲始徙金華蘭谿之椒峰孫吉甫宋國子助教公高祖也曾祖伯玉祖巨川父子祥曾祖以下皆不仕母盛氏公幼已負志挺特不與凡兒狎就學外傳勤勵不懈中永樂乙酉鄉試明年成進士賜勅歸進學又明年召至授湖廣道監察御史慨然以功業自期明憲紀究律意而用法平恕至遇巨奸猾為民厲者亦不少寬假聲譽遂起嘗巡按江西廣東福建克振風裁時 仁宗

皇帝監國尤所簡知間刑部都察院大理寺闕堂上官率命公署有重獄數以付公公感上知遇夙夜盡心每事親理有所顧問應對詳明一時老成多推讓之陞江西按察使先是南昌新建二縣苦上官和買長里役者供一日費家爲之空公視事之日立罷之權聲溢路而私不便者皆側目焉然眎公自用簡儉終亦莫敢一語侵之積歲訟牒填委悉取省閱擇其尤甚者自聽斷餘悉歸郡縣滯獄一清在江西五年政用肅然丁內艱去服闋改福建按察使治職如江西而有司之務倍繁稍濟以寬宣德三年召爲南京都察院左副都御史時南京諸司緩弛御史尤縱公奉勅簡擇奏黜其不肖及庸懦者殆半繼奉勅偕六部長貳簡黜諸司之不肖庸懦者綱紀復振爲入外肅內寬仕二十餘年所歷中外皆風憲於條制故實與夫施措之宜默識明習所至糾劾官邪舉大體而略瑣細家居有孝行旣仕得祿時惟母在迎奉就養極其愛敬母喪哀毀所居產瑞芝者再鄉里以爲孝感處朋友寮屬必約之於義有所薦舉必清介士其廉潔之操蓋終始一轍宣德五年正月十二日夙興衣冠坐得風眩疾遽卒訃聞上爲悼嘆遣行人

賜祭又命有司營葬事春秋五十有六

南京都察院左副都御史夏迪傳

雷禮

夏迪字廷簡號霞軒浙江台州府天台縣人生而魁
偉聰明介特事親友弟極其孝愛既長備邑庠弟子
員洪武丁卯以書經中鄉闈戊辰上春官適遘疾弗
遂厥志援例入胄監卒所業夏六月奉使河南建置
平倉事己巳之山東招諭人民咸訖事庚午試政于
刑部時迪父松谷君以耆年有德應召至京辭以老
疾還迪幸賜告侍歸踰年松谷卒迪哀毀骨立葬祭
無踰禮甲戌服闋上京師授溧陽縣丞勤撫字吏民
信服邑邇年丁水滂迪賦數夥其糧里有鬻妻貨子

願償所逋猶未能集甚至有喪身亾家者迪憫而思之乃勸借於殷實巨家得米十萬七千零先足官賦次贖其子女以歸人咸德之明年以舊官復任郡戒行邑之人願留不可得明年調福建懷安縣丞蒞任一如溧陽之政翌日朝廷以虧兌遣官來徵民無所措迪有白馬卽解以輸官一不與較于時理問缺署事之官所司知其廉能委以任之推讞詳審剖決平允略無留滯薦陞大理左寺副凡遇審決一以至公無不得其平焉壬午 文皇卽位陞吏部文選清吏司員外郎轉本司郎中銓選遵常制百司官使舉得

其人名達

仁皇試以太極論褒美有嘉丙戌拜河

南左參政有妬其能者交訐陰私詔繫獄候勘明年

春 仁皇憐其無辜請命於行在宥之從隆平歲分

理庶務尋授兵部司務四日召至文華殿諭以戶部

田賦不清今用爾爲浙江司郎中稽考來迪辭之以

浙人復諭之曰爾不作弊奚辭卽叩頭奉命不數日

清理明白尋拜四川左參政及辭仍命傳置到任凡

司之繫獄未決徒犯不下十數卽時推審獄無淹滯

人咸悅服先是所屬土官嘗以進貢道經本司在官

者各饋馬一匹迪至亦如之獨不受衆皆服其廉時

朝廷遣使採辦木植踰越歲時厲氣盛行民多夭折
迪因入覲備陳民瘼 齎勅寬免軍民歡聲如雷庚
子丁母憂甲辰夏調江西左參政 仁皇卽位遣使
召至拜南京都察院左副都御史政暇日語諸弟子
曰我今際遇明時賴祖宗積德所致而祠堂之制未
建於心能無愧乎汝等竭力經營我罄囊措置於是
拓基肯構制度儀物類依文公家禮又割松谷君遺
田五十畝以充祭田凡四時先隴等祭量入爲出著
特思儀略一編以識之永爲子孫世守乙巳夏五月
領詔督常州府稅糧先是本府困於水災迪至今郡
守熊觀等勘實徧召鄉之巨室諄切諭之發倉撥廩
得米六萬餘斛以充賑濟公私賴以給助間以糧里
跋扈兜收細民稅糧踰期逋負迪程督迫切有唐達
者托舊僚顧行之子顧賓齎賂迪求免直抵南京迪
子幼讜年甫十二辭不敢受賓棄而奔去追尋弗得
迺令人至常州察院以告迪駭其事卽擒顧賓等劾
所由連所賂親送赴北京奏之朝廷知其出於非辜
唐達等悉抵罪丙午二月忽邁疾卒于金臺年六十
有一天台志公居官三十年布衣蕭然妻子有不足
之嘆殆非虛語云

南京都察院左副都御史謚文恪吳公訥神道

碑

錢溥

大江之南有古君子凡用於世可傳於後者曰海虞
吳公初公以布衣應召為監察御史既而陞南京都
察院右僉都御史授中順大夫尋轉左副都御史授
嘉議大夫昉年七十以老疾辭者再 上特賜宴遣
之歸益以著述講授為事學博行尊褒然繫士林之
望年八十有六而卒天順丁丑三月十六日蓋致仕
後十有九年也 上遣官諭祭于家公諱訥字敏德
別號思菴姓吳氏世居邑東北隅子游宅傍曾大父

諱清大父諱天佑蘊德弗耀父遵道沅陵縣簿累贈
右僉都御史母王氏繼母陳氏俱封恭人公生而悟
穎絕倫甫三歲失恃鞠育於祖母又三歲得陳母撫
之七歲背五經正文弱冠聞沅陵君被誣繫京師卽
日誓往訴其屈事未白而父歿遂扶柩歸其祖母繼
母亦卒公哀毀瘠立葬祭一本家禮邑士化焉厭塵
市退居北郭大肆力經史百氏之籍研窮濂洛關閩
諸儒之學發爲文章務極根柢略無華靡之辭見諸
行事務厚倫族不尚撓競之習聲譽隱然日起授江
陰崇明二縣學司訓不就崑山馬令以名達禮部召

至南京時

仁廟監國命翰林試之將授官而太醫

院以素善醫奏教其子弟辭之改教諸大臣子弟於
禮部屬近臣復薦召至行朝見 文皇於齋宮奏對
稱旨俾日侍闕庭備顧問洪熙更化侍講學士沈度
又以經明行修薦授行在湖廣道監察御史毅然以
道自重不矜小名志存大體出巡江浙見仁和邑庠
有宋高宗書九經論孟碑多散布行路曰此南渡始
崇道學事也命檢其所遺得百二十片復置殿廊見
李公麟畫先聖賢像而秦檜記之有縉紳未純儒術
頗馳祖詐僥倖功利等語蓋指當時恢復之士曰此

正晦菴所謂邪說誤國罪萬死不足以贖者也卽命磨去仍錄其文使知邪說之言與夫表宣公奏議敘鄂王褒忠皆足歆人心而厲名教宣德庚戌陞都憲於留都始至適習儀朝天宮謁卞忠貞墓見其偏隘命道士撤垣屋還所侵地輯歷代名臣諫疏勵諸屬積案傷午裁決沛然上下憚服以爲神正統初上方御經筵卽集解小學搏條爲舉要以進旣歸復成補註性理羣書陳北溪性理字訓朱文公詩文抄吳文正文粹文章辨體詳刑要覽思菴前後續集行授子孫以經業凡求文者非其誠不與嘗辨子游聖門高第豈有荀况所謂愉儒憚事無廉恥嗜飲食之譏蓋荀去子游幾二百載其時子弟鄉人或狃於俗習遂乃譏及子游晦菴嘗記子游祠所謂使此邑之人百世之下復有如公者出一灑其譏今公自處雅儉粗衣蔬食不混流俗而又淵源其學本立而用行廬陵楊文貞公當代儒碩慎許可至論公著述皆端本澄源之作又謂古道古心非今世所恒有噫是豈不足灑其譏耶

南京右副都御史朱與言傳

實錄

南京都察院右副都御史朱與言江西萬安人永樂辛丑進士浙江道理刑同監察御史事乙巳拜湖廣按察司僉事宣德庚戌陞四川按察司副使奉勅捕盜劾都司布政司守土官之失機者而削其官陞賞巡捕之有功者立守禦所二巡檢司三於要害盜遂寧息雅州妖人自稱鬼王聚衆作亂與言執械送京師境土以平尋召還拜都察院右副都御史涖事南京號稱明允嘗有所建明多切時病未幾乞致仕景泰六年六月卒與言爲人剛方廉慎不屈於物有

所猷爲務存大體不事苛察人謂其得大臣之體

通議大夫資治尹南京都察院右副都御史

公箎神道碑

彭華

成化十年五月二十四日南京都察院右副都御史

南昌羅公卒于家訃聞 上悼惜遣官賜祭營葬公

諱箎字應韶一字叔和其先泗州人有仕楊吳爲吉

州錄事者留家於吉十五世至蘧菴仕元爲江浙儒

學提舉子後可葬之南昌西山因徙居焉後可生文

富文富生德厚德厚生公器是爲公曾大父大父父

也大父父皆贈如公官大母王氏母郭氏皆贈淑人

公器甫廛居而士習好賢急義喜與縉紳游而公爲

獻徵錄

之子自少有所觀法十四入郡庠祭酒胡公儼致政
家居面試之甚奇愛其才每出必召與偕公益自淬
礪學日以進及領薦上春官辭乙榜入國監又爲祭
酒李文忠公所稱許乙丑登進士拜雲南道監察御
史戊辰奉命巡太平寧國諸府清理案牘乙巳出甘
肅勞賞將士景泰辛未擢浙江按察司副使乙亥丁
外艱歸又丁內艱天順辛巳服闋陞湖廣按察使成
化丙戌晉都察院右副都御史巡撫湖廣庚寅召還
理南京都察院事明年奉勅兼督操江又明年以疾
懇乞歸休公才氣俊偉居官敢於任事所至有聲而

用法平恕恥苛刻初爲御史時閩中械爲亂者至無
長少皆論死公曰法十五以下當沒入豈可槩殺邪
自於都憲奏出之凡活三百餘人北虜不庭上疏備
陳關塞險易邊將賢不肖及防患備敵之策多見采
納兩浙漕舟三載一新以爲常而用工悉取於民姦
吏往往肆侵尅所靡不貲公蒞其事工稱費省斥其
餘錢還之民有邏卒得羣盜利其賄縱之且誣執良
民爲盜繫于獄陰嗾獄卒言其有反獄狀冀寘之死
以滅口公察知之立捕卒正其罪寃者得釋湖廣西
南境苗獠雜處喜爭鬪一日辰州苗因爭田相攻劫

或欲舉兵誅之公曰此事小可以檄止檄之不從誅未晚也檄至皆伏罪兵得不舉及爲都憲又揭榜諭苗獠以朝廷威德及順逆禍福狀聞者悚息間有不率肆剽者公畫奇邀擊之竟破賊乘勝搗其巢穴焚寨八百餘所斬首二千級俘二千人苗人自是鼠伏不敢出爲惡捷聞有文綺寶鈔之賜武昌城距江僅數尋每風濤衝激壞民廬舍且盡勢將齧城公課令商船自荆襄漢沔載石順流而下築長堤以捍江居者賴焉歲大饑公以便宜省浮費禁冗食緩催徵且勸分富室及出官帑以糴一二年間賑饑之餘積粟至六十萬石民困以蘇軍給用饒當公之築堤積粟士夫不悅公者因造爲謗語冀以撼公公屹不爲動卒有成功其在南京校講謀畫務持大體上疏規切時政乞親萬幾用正人遠邪佞納諫諍慎刑罰節內廷之賜予省官船之餽運皆人所難言者比歸杜門自適豁如也平生爲人簡重坦夷與人交不事矯飾尤喜濟人急宗族親戚有不足者輒分所有調之居閒好讀書爲文平實詩清雅和平有知菴集藏于家春秋五十有八

南京都察院左副都御史章公墓志

公姓章氏諱律字鳴鳳號容齋系出宋相文簡公先世自閩遷浙之樂清代有顯者迨高祖始家蘇之常熟祖煥文父珪號全名俱贈嘉議大夫都察院副都御史祖妣唐氏妣李氏俱贈淑人公生四歲失恃賴祖妣拊養自少有成人志恥伍里巷兒正統間全名公爲監察御史以直道弗容于時棄官歸隱闢園池構館宇爲游息之所公與兄國子助教儀鳳廣東參議翔鳳今南京大理卿韶鳳讀書其中自相師友識者咸以遠大期之三兄相繼登科入仕惟公侍父側

瑒力奉養日則綜理家務夜則篝燈苦學舉景泰癸酉鄉試明年遂登進士天順丁丑授刑部山東司主事甲申轉江西司員外郎屢辨疑獄衆稱神明成化丙戌擢保定知府保定爲畿內輔郡素稱繁劇及公蒞任興學校定戶役理冤滯抑豪強不爲利回不爲勢疚政聲卓然有聞初全名公爲權貴所擠至是其子夜率人劫奪姑家衆疑公必重其罪公笑曰忠厚存心毋懷宿怨父命也吾可違乎卒坐以親屬相盜律癸巳遷雲南右叅政時交趾遣使欲從臨安入貢公以非故道力拒之且疏言夷情譎詐宜飭邊備丁

全名公艱報闕改廣西左叅政庚子遷右布政適歲秋旱齋沐率官屬露禱精誠所感甘雨隨澍歲以大熟荔浦獐賊竊發遣將徂征公受命監督率泗城兵由象武路厄陳村口常賊要衝號令明肅士衆且戰且徠遂擒渠魁而悉散其脇從者營中屏竹槁而復生衆咸以爲不殺之兆捷音上聞特賜勅獎勵進秩正二品甲辰轉貴州左布政撫綏邊氓制馭苗獠咸得其宜丙午擢都察院右副都御史奉勅巡撫雲南其地爲公舊治民夷素服威德事皆不令而行朝廷推恩追贈二代弘治改元召任南京都察院左

副都御史掌院事仍食二品祿公感知遇益加寅畏
整肅憲度風采一新先是諫官有忤執政假以他事
補外任公首請復其職執政憾之會公在雲南時巡
按者處事乖刺嘗面折之既而其人以不職見黜遂
誣公受夷人賂召致廷尉按驗無實詔章服間居鄉
大夫祖餞都門外公曰某以疎直不卹人怨幸賴
天子聖明察其非辜得遂歸老之願足矣既歸杜門
却掃日課二子讀書預擇吉壤營壽藏暇則爲山水
之遊以詩酒自適若未嘗居顯位秉重權者因易其
號曰怡晚散人弘治癸丑八月卒

生宣德戊申五月
年六十有六

南京都察院左副都御史陳璠傳 實錄

南京都察院左副都御史陳璠字玉汝蘇州長洲人
成化戊戌進士改翰林庶吉士授戶科給事中歷左
給事中都給事中妖僧繼曉既就逮法司擬以常刑
璠與同官暴其罪遂伏法妖人王良惑衆通虜奏令
撫臣禁絕因請重天下社學以端蒙養則邪慝不興
有中人擊尚寶官於朝劾之俱坐黜彭城伯張信爲
幸臣所誣璠辨其非歷陞大理寺左右寺丞左右少
卿南京都察院左僉都御史兼管操江召還蒞院事
周府莊田與屯田相錯互爭不決璠往勘歸之府人

多非之璫著屯田十二難以辨再陞南京都察院左副都御史兼管操江劇賊施天泰等擾海上璫引兵會巡撫魏紳不卽捕滅第誘降其首而黨復熾爲言者所論遂致仕家居不一年卒時正德元年九月賜祭葬如制

南京右副都御史汪舜民傳

實錄

南京都察院右副都御史汪舜民字從仁徽州婺源人成化戊戌進士授行人擢河南道監察御史巡按陝西甘肅等處多所舉刺從父奎以御史言事廷杖舜民扶掖之坐謫雲南蒙自衛經歷歷遷廣東東莞縣知縣擢江西按察司僉事詳讞明允剖決如流擢雲南副使孟養餘孽思六叛據孟密承檄往撫定之以母憂歸服闋赴京會淮揚大侵議遣官賑濟之用薦改注山東理其事兼徐州兵備以便宜出納奏停不急之徵流冗多復業擢福建按察使盜竊福清縣

庫然家有所詆指獄已成舜民廉得真盜而罪誣者
脫三十人于死擢河南右布政轉左擢都察院右副
都御史巡撫鄖陽居一月例召還道改南京都察院
正德二年六月丙戌卒舜民有才略平生亦矯矯以
氣節自勵者

南京都察院右副都御史歐陽旦 實錄

歐陽旦字子相江西安福人成化辛丑進士授休寧
知縣擢監察御史歷按察司僉事副使布政司參政
左右布政使馴陞應天府尹其後乃陞南京都察院
右副都御史正德十年五月卒賜祭葬如例旦爲人
純謹有文學名其在湖廣浙江提督學政以寬厚得
士心入仕三十餘年貶議不及少時伯父敏待之甚
厚及貴乃爲其子魯授室且擇師誨之無異已子以
是重于鄉里

南京都察院右副都御史廣原孫公修墓志

姚涑

先生姓孫氏名修字用吉號廣原其先蜀之富順人
祖貴隱跡田野父顯行貨燕趙間時正統己巳所在
盜起遂占籍邯鄲應募禦虜積功至指揮使生三子
伯偉仲儒公其季也公十有二齡父歿母拊公孀居
公雖少卽勵志於學十五受詩于太史程先生楷之
門程先生深咨異之十八改事家君東泉公家君賢
者之疇也公文譽焱起高出倫輩弘治辛酉舉順天
鄉試乙丑舉進士正德改元拜戶部浙江司主事出

視壩上諸廐中官素羣蠹其中逆瑾焰又方熾衆皆危公公曰惟法是徇餘非吾憂也已而卒無他已已命公責逋賦于蘇常嘉湖諸郡公召守若令以禍福諭之未幾吏勤于督民樂于輸賦入大司徒錄其勞庚午春進廣西司員外郎尋改山東道監察御史是時言官救過不暇公侃侃自將咎譴弗及頃之瑾敗公治其獄有聲辛未春擢陝西僉事治延綏之東陞公爲之督察姦蠹時糧訓卒虜偵知有備引去總制張公泰輩薦公于朝者凡六疏癸酉改理全陝屯政邊民不忍其去攀號滿野甲戌巡撫金公獻民輩薦公者凡四疏先是屯廢不治者已數年公立法簡而嚴歲入數倍於昔陝人神之乙亥虜犯秦隴別部萬餘奄至平涼藩臬重臣有事于土者皆不至公偶以公事過之關斫祀備宗室內震城且陷公急令塞諸門招胡騎哈指揮者率敢死士百人發勁矢射之虜大驚乃環城數里而陣於是城守始嚴城外民居數萬家亦賴以存虜遂引却當是時徵公則平涼皆虜魚肉矣總制馮公清輩尤偉其績與部使者論薦六七疏丙子夏進陝西副使秋監文試戊寅陝人賜間御史宇文鍾主事田龍與給事中王元凱有隙王誣

宇文以謀逆有狀鎮守中官劉寶惑於廖愷之說奏於行在所 武宗命逮至軍門鞫之鎮巡諸公下使繫其人公察其無左驗止錄尤重者數人械送南都劉怒曰謀逆大事也烏可止以鍾龍輩塞詔旨其家屬并諸證人宜悉在遣中何故釋之衆不敢應公徐曰鍾龍雖曰謀逆而按驗無狀執二人以往足矣它日鞫而實彼家焉往如其誣也必獲伸雪又焉可累及無辜哉且誰無子弟公亦宜自念其家劉噤而止二人至南都雖庾歿獄中而其枉亦白罪竟坐元凱而數十百家卒賴公以免不然株連窮治冤濫將不可勝計也庚辰秋商有巨盜嚴天柱獲礦利甚厚擁其徒三千人襲商州破之遂僭號部署其衆聲搖關洛巡撫鄭公陽托固原有警避去檄公禦之公卒兵五千疾馳赴之甫一月薙獮無遺者公旣立功當有異擢而本兵欲薄鄭避事之罰不復序列公功公僅被勅褒賞而已辛巳擢山西按察使公廉有威上下憚之巡撫胡公錠輩薦公者凡三疏銓司擬公巡撫甘肅朝廷雖未卽用公而聲望自是益重嘉靖元年冬入覲部院思得異才以佐新政考諸藩臬之長特署公上考曰大受器也是歲總制鄧公璋旣劾薦公

而家君將去榆陽特舉公自代癸未春擢河南右布政使尋陞浙江左轄舟行抵維揚母病去浙祇數驛或勸倍道赴之有不諱殮費可責辦有司公泣曰此豈規利時哉留二旬而母竟卒乙酉秋服且闋遂菴楊公在關中首疏薦之丙戌補江西左轄公念兵火之後公私空竭乃謹出納杜請謁常賦賴以稍裕丁亥拜右副都御史巡撫湖湘公夙望素嚴賊吏相率棄印綬去時顯陵繕治公與有勞勩內臺左都御史嘉魚李公素不樂公會廷議處天下巡撫李乘間擠公賴在議諸公多知公賢戊子春乃改公南京操江

江洋巨盜陳表出沒剽江上諸民居公嚴立賞格躬率舟師蹙之三月就縛上嘉勞有白金文綺之賜公以北院改南其秩任如故特以操江與在院者事權稍異院長張公琮抑公於後來者之下公頗不悅曰禮與法未之前聞也吾不能辱官以媚僚友遂不復入院視事一時依阿澆忍者咸嫉公過剛公於是引疾之志決矣己丑春公以災異自陳詞甚懇惻上特聽之公卽日北歸杜門謝客數有薦公者謂公宜用不宜廢則天下之未能釋公者可知也公生於成化戊戌距今卒之歲年五十有六

嘉議大夫南京都察院右副都御史趙公載神

道碑

嚴嵩

公諱載字文載初舉進士名君琰武廟御賜今名

蒲州垣曲人也曾祖諱郎登洪武初進士爲監察御史巡按北平以風裁著稱祖諱信隱居弗仕考諱鼎以公貴贈奉政大夫戶部郎中母晉氏繼母衛氏俱贈宜人公中正德丁卯鄉試辛未進士授戶部主事陞員外郎郎中奉命督漕上疏極言漕政利病譽籍籍起陞陝西叅議撫治商洛嘗剿巨寇有白金寶鏹之賜土魯番侵奪哈密爲邊患總督遂菴楊公知公

才薦爲甘肅兵備副使時議者欲奄魯番擊之公言
外攘必先內治宜實糧餉利器械固堡寨謹斥堠用
間諜及倣趙充國墾田故事食足兵乃可舉否則虛
內事外徒啓邊釁疏上議遂寢公於是銳意屯種開
鹽召商實粟塞下期年而士氣大奮所戰克捷番酋
牙木蘭帖木哥等率衆降者萬餘人又酌屯田便益
十數事條上俱獲允行陞陝西參政仍兵備甘肅遂
陞都察院右僉都御史巡撫其地仍兼理屯政公稽
歲所入以革宿弊人不能爲欺邊方素不知學爲擇
師儒以教學官弟子諸番入貢每乞增額公奏請遵
定制驗放以省供億鹽引課令本折兼輸以便商賈
虜至督將士出戰凡所斬獲親劾功次以明激勸守
邊數年政績大著陞南京都察院右副都御史提督
操江旣去任猶陳邊務十二事曰此吾所已試者俾
後人守之耳然是時言者摘他事劾公奉旨聽勘久
之事得白衆望公起復用而尋已不祿矣公生成化
壬寅卒嘉靖癸卯享年六十有二訃聞詔賜諭祭命
有司營葬復以邊功錄其子爲國子生蓋異數云

南京都察院右副都御史兼攝大理寺事松洲

柴公經墓志銘

崔桐

公諱經字季常松洲別號也幼敏而文長魁庚午鄉
薦登丁丑進士授刑曹主事會武皇帝巡遊偕部
僚伏闕諫詔跪闕下五日廷杖三十奪俸半年時彬
寧羣兇奸國紀公不爲撓前雪冤獄周世昌等十餘
人爲同官藁城張公所愛重謂公長於宣奏薦應銀
臺選公以速化爲恥力辭免今上御極用諫官言
加公俸一級癸未公陟雲南僉事憂歸闕補湖廣時
辰州有鄭生者所司以怨坐之歲刑監司以生富故

不致辨公獨條其寃狀無所顧忌生乃免沅州有判
負當路姻恣貪虐公按其罪一道慄然岷王以罪廢
議者欲攝以郡王公謂假人以柄疑僭生嫌卒與撫
臣定議令世子自新以杜覬覦保靖酉陽二室慰積
怨構兵數十年莫之解公承樞往撫之諭以朝廷恩
威二僚卒受約束芒部告變公將楚兵萬餘會總制
伍公于貴陽號令嚴肅僚夷悚讐庚寅公遷貴州參
議時大臣督運巨木經畫失宜公抗疏陳曩構飛橋
傾墮之害請從民便事易集而民不勞公之力也劇
賊周天星之變川貴病焉朝議合兩撫臣兵攻之公
盡瘁調兵餉與賊對壘晝夜不敢怠賊平受鏹幣之
賞辛卯遷江西按察司副使撫臺龍湫王公廉其賢
道義相信展布益著甲午遷廣東按察使渭厓霍公
謂前使追復梁氏所據憲司池爲非力請歸梁而公
不可雖忤渭厓以素知其賢且嘗薦之亦莫之憾也
丙申遷右布政使時兩廣軍門儲匱公條陳便宜數
十事白於總督錢公榜示列郡於是水陸並至輸運
委積丁酉大水自嶺至雄州霖潦湮道公計發帑構
橋走涉稱便梅國劉公爲置碑以紀其績庚子以憂
闕補四川尋轉左使議糧籍定稅額以均徭役鑿山

刊木通道于荆陸馳二千餘里民無病於覆溺辛丑
公晉南京都察院右副都御史提督江務公法律詳
備江防改觀壬寅視篆本院兼署事大理有監生吳
仕者以無罪蒙重擬部堂允之而公不允池守減大
姓徐正本從坐者數十人撫臣允之而公不允被論
謝政癸卯二月也公平生事親孝太安人教子婦有
家法公泊李安人奉之甚謹嘗一奉至楚色養備至
太安人老不喜出乃留妻子承歡凡五任不以隨行
撫諸弟甚友愛與人交直而不矯敬而不諂居官處
家清介壁立至決大疑臨大事侃侃烈烈意每依於
忠厚真金玉君子也

南京都察院右副都御史雪屏趙公汝濂墓志

銘

李元陽

公諱汝濂字敦夫姓趙氏世爲南中太和人高大父
諱賜曾大父諱均咸有隱德爲鄉評所推大父諱平
贈推官考諱儀治禮記領雲貴鄉薦魁初授涪州學
正歷應天府推官瀘州知州有惠政累贈中憲大夫
配段氏累贈恭人以弘治乙卯生公公七歲時步趨
舉止不類凡兒八歲能屬對句恭人常語人曰此兒
言動如有教之者十二歲在涪從師學易同門十二
許人惟公與夏公邦謨穎敏出羣其師曰若二子者

不必師矣後夏爲冢宰公爲中丞人以師爲有識云
十五歲浮涪水偶見鄰舟乘迴旋將覆公喚舟子急
移已舟救之舟人曰灘漩如此往救恐亦不免公曰
彼生吾亦生彼死吾亦死坐視其溺豈人心乎卒之
兩舟皆濟所活二十餘人公父聞之喜曰吾有子矣
自是公益勵問學嘉靖改元壬午中雲貴鄉試易魁
壬辰成進士釋褐都察院觀政是年冬十月選改翰
林院庶吉士乙未授吏部考功司主事丙申調文選
司主事轉驗封司員外郎己亥轉稽勲司署郎中調
考功司庚子實授考功司郎中次應補文選公白冢
宰曰頃者考察一任積怨已深若轉銓司謫毀且至
願得南京尚寶足矣冢宰曰此對品耳非所以處賢
人也衆譁然勸公入銓司以爲美秩之地公曰銓郎
雖好然伺候兩府趨趨風旨此豈迂拙之所能耶明
日詣內閣辭皆曰宜晉四品公曰四品之例在銓郎
則可在某則不可與其爲人所忌不若爲人所忌諸
老皆喜意取南尚寶卿一時輿論多之甲辰由尚寶
轉太常寺少卿轉右通政丁未轉太僕寺卿庚戌轉
太常寺卿尋轉都察院右副都御史協掌院事辛亥
同南京吏部考察京官時以公舊歷斯任每事咨焉

多所推服是年公自陳奉旨對品調外任公歸里既
二載甲寅吏部咨聽調官員如有疾自甘休致者聽
具奏以原職致仕公如例乞休奉旨准以右副都御
史致仕隆慶改元例進正奉大夫正治卿已巳卒于
家時年七十有五公爲人簡默平居言呐呐若不出
口及廷中有大論議寥寥不少阿屈聞者悚然爲考
功郎主京考察事人謂公曰兩閣下私人須先請問
否則匪直損官而已公艷然曰若此何用考察爲哉
竟入部明日立堂上簿唱官名都察院王左都曰御
史某某應改調公曰此數官者未聞其過王曰雖無

京察
職議
文均

過然乏風力公曰不宜御史猶宜別官本院改題可
也考察所以摘過豈宜斥無過之官耶王默然久之
首肯曰是是部屬魏某者端人也本堂周尚書欲黜
之公爭之不已周怒而詈公亦詈諸老解曰考功雖
無所聞本堂必有所見姑從之勿爭遂削其籍堂事
卽畢部院欲散公申言曰今年考察不虧人只虧一
魏郎中耳頃之科道拾遺奏上獨留之後魏官至兩
淮巡撫公相見未嘗及之其器量弘毅有如此考察
疏名將上時冢宰謂公曰黜中有某某者內閣之姻
黨某某內閣之門人某某內閣之愛幸此疏一上恐

爲衙門累也公曰決不累衙門惟郎中不自顧惜斯無患矣豕宰又曰趙某者內閣倚信決不可黜公曰趙某不黜則無可黜之官矣竟持疏入朝方納所奏本旋步間忽有喚趙考功回者其聲甚厲乃闈寺二人還所奏本曰爾何苟且如此吾輩不敢進須速易來視之本面漫漶公少悸知爲權門意也因毅然曰此本決不可易但進之生死吾自當之諒不至貽患諸君也闈寺語塞明日旨下果留趙某等三人無他患也後時趙某與嚴氏聲勢相倚總制淮浙威震中外遇公于途譏公曰昔時會殺人今能否公應之曰殺人而人不死恨刀不銛耳彼怒目而去其于利害之際深沈不撓有如此初爲通政時狀至輒審誕辭必刑項之部院皆喜訟簡既而乃知舊通政無不准之狀至公始判其虛實故無情之訟自止也公兼操江時各司解賊犯但閱其申文卽付之有司刑曹問公曰不杖賊犯何也公曰五城拿官御史問官理問司獄獄官皆以笞捶從事吾三法司堂上如律定罪而已識者然之其知法意每如此公在太僕時堂例費千餘金僚佐亦皆霑及公一無所私僚佐以爲矯激公乃集衆量分已獨無取衆謂公亦宜受公曰諸

君有出巡之費吾塊居於此受之無名竟不受其爲
馬政革相治之習相馬給直價不太費而馬數易盈
民皆稱便南太僕至今以公爲則也公自離考功日
日圖歸蓋見讐家顯盛自顧不能久於其位卒之公
論在人徧歷清銜官至右副都御史時有讐家浼李
給舍論公給舍奮然曰吾豈代人報讐者旁人聞之
以告公曰荷李公知已然吾官至此已出望外矣歸
里以來不入治城第日與田夫野老拄杖遊行就山
麓營一草菴有暇輒往歌嘯其中名其菴曰覺真謂
人曰平生涉歷畏途殊無真意乃今覺真惜乎晚矣
公敦內行祖之居宅父之宦囊一毫不取皆推與弟
姪爲之嫁娶公爲人長者人或犯之付之一笑不與
較曲直使久自悔貸錢不取息貧則還其券以周之
作詩文信手應人不爲雕蟲之技

南京都察院右僉都御史嚴升傳

實錄

南京都察院右僉都御史嚴升字仲升直隸繁昌縣人由進士授蜀之青神縣知縣調巫山縣一以誠心愛民所至有賢名永樂初下詔求賢用薦陞江西按察司僉事坐累左遷順慶府同知改吏部考功郎中在職六年澹靜自守而勤于職務 仁宗皇帝嗣位遴選廷臣尚書蹇義舉升陞大理寺右少卿升沈毅剛民執法明慎奉命清理軍政蘇州諸郡舊俗豪猾肆姦誣平民爲兵者多升至行之以公明民莫有受誣者調都察院右僉都御史與左副都御史邵玘同

心蒞政屏黜不肖風紀用張升清素儉約雖居顯庸
飲食衣服無異寒士而風裁嚴峻不可犯云宣德五
年十一月卒

南京都察院右僉都御史張公楷神道碑

李賢

天順庚辰冬十一月南京都察院右僉都御史張公
致慶禮于京師一疾而逝是月七日也 上聞訃驚

悼已久特遣官諭祭復令有司爲營葬事公諱楷字

式之浙之寧波慈谿人天資穎敏讀書過目卽成誦

年十二能屬文有司聞其名召補邑庠生十七領鄉

薦登永樂甲辰進士宣德改元之明年試政於夏官

時方北征輿馬之需甚急大司馬雅知公才委往關

中督之果先期而集拜江西道監察御史初有強盜

繫刑部獄中吏受賂脫之公劾尚書以下十數人皆
罷黜名聲赫然六年考績至行在因獻聖德頌正統
初乃還在任能辨疑獄有造偽印者本夏三也賂書
牒人吳謙承之公廉得其實以罪三有與妖僧作逆
事者連坐其主當族公察之逃日所爲主得勿論有
兄毆人死誣與弟同毆歷臺審無能辨之者公察其
枉謂毆時爾安在日在鄉學乃拘其師友驗之果然
遂釋之此類甚多庚申用大臣薦陞陝西按察僉事
理屯田督租賦治水利俱有成績尋遷副使時靖遠
伯王驥巡邊以公同行公上安邊十二策多見采者

丁卯陞都察院右僉都御史畿甸蝗起

上命公督

捕公授郡邑捕法而按行之蝗遂息閩賊鄧茂七作
亂朝廷遣將率兵往平之以公爲監軍兵至廣信賊
黨圍延平甚急公謂都督劉聚曰賊聞大軍至寧無
懼心卽具榜遣人馳諭以威信賊果解去兵至鉛山
賊圍將樂公調都督劉得新乘夜襲之賊皆潰散茂
七僅以身免退保陳山公駐兵建寧四招其黨賊復
攻延平公以浙江軍伏後坪南京軍伏後洋江西軍
伏沙溪之南而以福建軍素爲賊所易者出城挑之
已而駁作伏起合擊大破之遂斬茂七俘其衆未捷

之先朝廷慮賊衆兵寡復遣寧陽侯陳懋統大兵繼之至則茂七已誅餘賊有據九龍山者公選精兵二千撤其筏誠曰明日賊必空寨來攻若疾入其寨而反攻之比旦賊視我營兵少果至溪上無筏而還二千兵已據其寨用其滾木擂石下殪之賊衆遂降凡定三郡七縣破三十六寨擒偽總兵學士等官三百二十四人招徠其民八十餘萬初處州賊葉宗留亦起已遣都督徐恭征之至是復勅公旋師與之犄角恭次金公山甚危公往援之至卽伏兵樹鴨兒芭爲壘賊至公麾兵擊之少頃佯走賊追逼壘伏兵四起

一鼓殲之景泰改元公班師至京有妬其功者劾公初至耽詩玩寇以罪罷歸天順改元 皇上復位念公之勞仍舊官致仕明年陝右興師禦寇而督軍餉增戰騎募勇士以佐師者難其人適公至京入謝上見公曰朕得其人矣遂以公往還京 上嘉勞之轉南京都察院方專委託而數止于斯豈非命耶主洪武三十二年三月年六十有三公好獎引士類見人有善必延譽之遇患難者必拯濟之尤篤於友道其學浩瀚善行草隸篆所著有四經糠粃大明律斛律條撮要諸書至於選詩唐音李杜詩草堂詩餘凡

十數家公悉和之累數百卷

南京都察院右僉都御史陳世良傳

實錄

南京都察院右僉都御史陳世良字宗之浙江海鹽縣人成化丁未進士授樂安縣令改南和擢監察御史南京大理寺丞世良資性明敏尹南和時陳言便民六事民德之爲立去思碑逆瑾擅權以事中世良罰米至二千石餘瑾敗擢南京大理寺右少卿未幾拜南京都察院右僉都御史兼理操江時武備廢弛不習戰士卒皆影射無實倉卒則募沿江漁戶充之及流賊至皆望風犇潰劉六劉七之過南都也世良率兵出禦事急隱蘆葦中得免竟爲言官所劾勒歸

致仕正德十四年九月卒于家

南京都察院右僉都御史裴公紳墓志銘

張四維

蒲州人都察院右僉都御史裴公卒於家距生正德
癸酉六月六日得年五十五耳初公巡撫陝西時中
飛語聽調里居于時五朞矣會今 天子登極搜揚
遺碩科道交上疏薦公可大用詔報可迺公忽以訃
聞 天子悼之特頒御祭一壇公階四品不滿一考
于法未應賜祭蓋異數云公神宇冲粹涵蓄甚富與
人婉款有情恂恂自將見者起敬至於論當世事辨
人臧否稽古今同異侃侃焉出之有緒而不滯也性

故好學發而爲詩文清潤雅飭如其爲人尤喜接引後進出其門者彬彬多知名士當嘉靖丙辰丁巳時公居內艱余亦罹先宜人之變與今太傅冢宰楊公及余舅督府兵侍王公俱守制在里余因獲從三公者講業于楊公北墅大椿堂中見公外溫內理不爲巉巖皦異之行而中截然不可犯根心出言無纖毫矯飭致可敬也謂公且宏濟於時不且充所解諱磨礪浸漬登作者之域詎謂中壽未躋乃奄爾物化耶悲哉公諱紳字子書別號右山斐氏故爲河東望族八系出聞喜晉公度之後勝國時有澤民者以功授

銀符爲達魯花赤領平陽事始定居於蒲澤民子七敬陝西行省叅政居敬子約文爲元總管數傳至公曾祖瓚祖英俱隱德不仕父肅以公貴封文林郎河南道監察御史母張氏封孺人公幼穎敏能日記千百言未總角卽爲學官弟子員試輒占高等嘉靖甲午舉於鄉戊戌登進士授行人辛丑擢監察御史督理長蘆山東鹽課近京多奸民依憑城社私販大行公首禽鄭尚書僕置之法仍對仗彈尚書奪俸比公代遂無復私販者乙巳按真定是時虜連寇太原公乃議增紫荊諸關埤塹事竣有白金文綺之賜丁未

按浙江上海防六事詔悉從其議蓋是時海盜漸不靖矣朝議設都御史督軍務而都御史者顧捕戮平民報首功公檄臬司問狀都御史乃大恐公以其不克肩重任故條言其事自後海寇益猖諸建白防禦計無慮數十上率無越公議者戊申丁御史公憂辛亥起復陞山東按察司副使提督學校崇實學杜請謁諸所獎拔皆藉藉有養之士乙卯陞河南布政司參政撫守汝南其冬丁張孺人憂戊午起復補四川布政司參政庚申陞江西按察使辛酉陞河南右布政使未幾卽拜都察院右僉都御史巡撫陝西壬戌

春虜犯延綏公聞警提旅馳之遇其南下于是朝議謂總督程公不任事擬公代之未果其冬虜復自寧夏入公督衆迎拒斬首八十餘級以捷聞乃益爲內地備簡西安等衛卒三千人奏設叅將一員團練會城陝當滇蜀孔道民苦于供億有忻城伯某者使蜀過陝又特稱貪害公廉其不法狀數十奏之且請自今勲臣出使毋枉道上命著爲令併徵忻城伯還忻城伯懼自殺秦地肅然初公督學山東時有一二鄉官求庇其不肖子弟不得則大恚已乃作爲謗書徧騰之兩都中當丙辰時旣撼公不動益慚憤至是

歲癸亥屬京察期復以流言中公甚異賴當道者稍
稍知之乃奏改公南京公曰吾矢勤于國而顧增此
多口命也遂歸臥河山舊廬課子明經尋繹故業日
與故友嘯咏杯酒間若未嘗涉世者山西撫按若延
安楊公南昌萬公鄭州王公海豐楊公濰縣王公先
後各以公之德美疏聞于朝不果用

焦太史編輯國朝獻徵錄卷之六十四終

